

Qalam

Bilangan 100

Rabiul Akhir 1378

November 1958

60 Sen

Dari Hal Kita

Oleh kerana banyak syor-syor yang didatangkan kepada kita oleh pembaca dan wakil-wakil penjual kita maka **majalah Qalam melalui keluaran ini** harganya diturunkan semula dari **70 sen** kepada **60 sen** senaskhah dan **gambar-gambar hadiah** di dalamnya **ditiadakan**.

Diharap mendapat perhatian daripada pembaca-pembaca umumnya dan wakil-wakil penjual kita khususnya.

Ketua Negara dengan Agama Islam

Sesudah kemerdekaan Tanah Melayu diisytiharkan maka serentak dengan itu kerajaan Perikatan, dengan persetujuan Yang di-Pertuan Agong, agama Islam adalah diakui sebagai agama rasmi Persekutuan Tanah Melayu.

Semua umat Islam sama-sama gembira dan bersyukur menyambutnya sekalipun mereka mengetahui bahawa buat sementara perjalanan agama itu hanyalah meliputi perkara-perkara yang biasa dijalankan masa penjajahan dahulu di negeri masing-masing – tidak untuk melaksanakan hukum agama seperti yang dikehendaki oleh agama Islam.

Kita bergembira mendengar apabila Seri Paduka Yang di-Pertuan Agong tatkala hendak menduduki istana

baginda bahawa baginda tidak puas hati atas istana itu

kerana belum ada tempat sembahyang.

Begitulah gembiranya hati umat Islam melihat bahawa ketua negara sendiri mengutamakan hal-hal yang mengenai agama dan umat Islam percayalah dengan sesungguhnya bahawa ketua negara adalah seorang yang taat kepada agamanya yang ertiinya menghormati perjalanan agama.

Yang demikian lebih-lebih bergembira lagi melihat Yang di-Pertuan Agong menghadiri istiadat-istiadat agama seperti sembahyang Jumaat dan lain-lainnya serta timbulah kehormatan mereka kepada apa zahir dibuat oleh baginda.

Perbuatan-perbuatan serupa inilah menjadi harapan yang baik bagi umat Melayu yang beragama Islam dan bagi orang yang taat serta kasih kepada agamanya. Mereka berharap bahawa jika sekiranya ketua negara menghormati agama maka diharaplah kelak, dengan beransur-ansur sampailah hajat umat Islam di sini bahawa hukum agama Islam akan dapat dilaksanakan di negara ini. Mereka bersyukur mempunyai seorang Yang di-Pertuan negara yang menghormati kemuliaan-kemuliaan agamanya.

Tetapi alangkah terperanjatnya umat Islam apabila wajah Yang di-Pertuan Agong berserta Permaisuri Agong tersiar di dalam keadaan berdancing di istana Yang Maha Mulia Sultan Perak. Tersiaranya gambar itu seolah-olah menjadikan harapan umat Islam itu pecah terhempas ke bumi, remuk redam kerana mereka melihat kalau sudah Yang di-Pertuan Negara tidak mengawal dan menghormati kedudukannya sebagai Yang di-Pertuan Negara terhadap agama rasmi yang diisytiharkan itu maka tentulah orang-orang yang di bawahnya akan lebih-lebih lagi akan membuat noda kepada kehormatan agamanya.

Kita tidak mau menyebut perkara ini kalau sekiranya perkara itu dilakukan dengan sulit kerana kita pun pernah mendengar yang demikian diperbuat tatkala

baginda menjadi Yang Dipertuan Negeri Sembilan dahulu dan dibuat dengan *shakhṣiyah*. Kita tidak akan berkata apa-apa jika yang demikian itu dibuat secara peribadi oleh Seri Paduka Yang Maha Mulia Tuanku Abdul Rahman bin al-Marhum Tuanku Muhammad tetapi kita terpaksa berkata-kata dan mengingatkan perkara ini jika dilakukan dengan sifat baginda sebagai Seri Paduka Yang di-Pertuan Agong kerana umat Islam umumnya terasa dukacita jika Seri Paduka itu sendiri menjadi seorang yang melanggar perkara-perkara yang tidak disenangi oleh umat Islam yang dilakukan di hadapan umum.

Kita yakin bahawa umat Islam sangat bersedih hati atas kejadian ini dan umat Islam terasa benar bahawa seolah-olah Islam agama rasmi itu jadi permainan, kepada suatu masa di dalam masjid, dan pada suatu masa di majlis-majlis yang tidak diperkenan mereka dan tidak menyenangkan pemandangan mereka seperti yang pernah dikatakan oleh al-Ustādh Zulkifli Muhammad.

Yang telah lalu itu sebenarnya tidak dapat diperbaiki lagi tetapi seyogialah hendaknya yang telah lalu itu dijadikan penyelidikan tentang perasaan hati rakyat yang beragama Islam semoga dapatlah kiranya penasihat-penasihat Ke bawah Duli Seri Paduka menyampaikan perasaan dukacita rakyat yang beragama Islam ke atas peristiwa itu. Kita berharap tidaklah ada lagi kelak peristiwa-peristiwa yang serupa itu berlaku kerana jika berlaku juga bermakna menghilangkan kepercayaan umat Islam.

Kita buat rencana ini tidaklah sebagai bidasan tetapi adalah kita hadapkan untuk menyampaikan perasaan, perasaan yang kasih dan taat setia semoga di dalam perjalanan-perjalanan masa akan datang hiduplah perasaan rukun dan damai pada hati rakyat-rakyat yang beragama Islam. Kita berharap

semoga dapatlah Allah memberi taufik dan hidayah-Nya supaya kita berkeadaan biasa di dalam tegur menegur dengan ikhlas untuk kebaikan bersama – Amin.

Islam dengan Kebudayaan Melayu

Salah satu keputusan yang diambil oleh Kongres Kebudayaan Melayu di Melaka pada bulan September 1957 dahulu ialah yang dinamakan kebudayaan Melayu itu ialah kebudayaan yang tidak bertentangan dengan agama Islam. Keputusan ini diambil, kita percaya, ialah setelah mengetahui bahawa agama Islam ialah agama rasmi bagi Persekutuan Tanah Melayu.

Yang disebut dengan kebudayaan, menurut pendapat kita adalah meliputi di atas tiga perkara: 1) bunyi, 2) perkataan, dan 3) mengenai perbuatan (termasuk dalam hal pakaian dan seumpamanya).

Telah sepuluh bulan lamanya berjalan kongres itu hingga hari ini tidak seorang pun ulama-ulama Islam yang bangun atau tampil ke hadapan untuk menerangkan apakah sempadan adat istiadat Melayu atau kebudayaan Melayu yang sedang berjalan yang menyentuh atau bertentangan dengan agama Islam terutamanya pertentangannya yang membawa kepada syirik.

Kita berasa telah tiba sangatnya bagi Majlis-Majlis Agama dan Adat Istiadat Melayu di negeri-negeri Persekutuan Tanah Melayu membuat masalah-masalah yang mengenai perkara-perkara kebudayaan-kebudayaan yang ada sekarang untuk dikaji bersama di dalam hal yang mengenai tiga perkara tadi iaitu bunyi, perkataan dan perbuatan yang ada dijalankan di dalam istiadat-istiadat Melayu masa ini.

Kita cukup mengetahui bahawa agama tidak menegah kepada kaedah-kaedah yang disebut dengan seni bunyi asalkan